



焦太中編輯國朝獻徵錄卷之九十二目錄

河南一

布政使

李禎

蕭省身

豐慶

程泰

沈杰

劉挺

蔡潮

楊子器

孫存

叅政

鄭居貞

李崙

閻仲寧

顧福

吳愈

秦文

潘鑑

丁致祥

劉友仁

王慎中

樂護

叅議

閻欽

王億

按察使

姜綰

李璽

李攀龍

副使

陳壯

劉俊

陳束

史葵

顧瓌

文皓

章時鸞

僉事

江暉

焦太史編輯國朝獻徵錄卷之九十二

河南一

布政使

河南布政使司左布政使李公禎墓碑

錢習禮

太宗文皇帝入正大統首下明詔搜揚側陋思得天下材智之士以共新治道而尤嚮用儒術永樂癸未廷試取士四百七十二人世稱是科得人爲最盛河南布政使司左布政使李公昌祺其一焉公少負材器志於用世繇郡學生明經取進士第簡入翰林爲

庶吉士性素介特至是益自檢飭達官勢人未嘗謁之私第會修永樂大典禮部奉詔選中外文學士以備纂修公在選中例凡經傳子史下及稗官小說悉在收錄同事者僻書疑事有所未通多質於公推其該博精力倍人辰入酉出編摩不少懈退復以其餘力發爲詩文應人之求者皆典瞻非苟作隱然聲聞館閣間書進被宴賚擢爲禮部主客司郎中部凡四司主客視他司最煩劇官難其人公以明敏濟之不怠剗治其間庭無留事退視其私一室枵然無長物俸不足以供費泰然不以屑意堅苦勵節時流少與

爲比尚書呂震有巧佞材倚被主知狼懷自用專以嚴憚下人羣吏莫敢仰視慢易僚佐少忤其意者輒中傷之衆皆側目而視公特異有所承稟色辭俱溫始終不少衰駕幸北京 仁宗以皇太子監國兩命權知部事行在吏部奏藩憲員缺 太宗命簡兩京朝臣有材望者補之 仁宗舉公等若干人應詔宴于禮部予道里費至卽陞爲廣西左布政使朝野榮之廣西地極南徼溪洞獠獠時出剽掠邊氓苦之公至而威望凜然徂伏深阻不復出爲民患境內宴安政務修舉尋丁外艱去官吏民皆追思之服除入覲

仁宗在位言於朝曰此佳士良不易得在列竦聽退而相與喜嘆不已先是河南連歲旱蝗民多死徙太宗震怒被災郡縣有司不以上聞者悉逮寘于法思得人以撫安其民改公往蒞河南被命卽就道旣至宣布主恩疏滯舉廢救災恤患憫下窮繩豪猾去貪殘方岳之政所當舉者盡心焉質明起眠日入方息居數月政化大行聲績茂著後丁內艱歸服喪河南海饑本司累奏起公治之宣宗命奪喪乘傳赴官爲治如初勤勞倍之因感風疾不待引年堅乞致仕詔報可旣歸而先廬僅蔽風雨服食清約如寒士

伏臘不充處之裕如居雖密邇郡城足跡未嘗至公府守長於政務有所咨決極言無隱因其言民陰受其惠者居多病間輒書不去手吟咏自娛遠近有求文者應之不倦一日疾革遺訓二子惟以力學修身爲言餘無他語儵然而逝時蓋景泰壬申歲也距生洪武丙辰年七十有五公諱禎字昌祺別號僑菴世家金陵宋南渡有諱義者仕爲郎中扈從隆祐太后南上留居吉水之烏江弱冠爲文藻思溢出蔚有老氣不惟一時才俊若禮部侍郎曾公子棨輩相與頡頏名聲不相上下鄉之老成人亦皆駭其文識謂必

顯于世平生所著詩文若干卷藏于家嗚呼昔之所
謂大臣者委身徇國夙夜憂勤以任天下之重遑惜
其私故宋杜正獻公身至大拜歸老無屋以居寓於
南京驛舍范文正公晚參大政妻子僅給衣食至其
卒也家無以爲喪公任牧伯身寵家溫固其室也而
乃俛盡厥職空乏以終其身所謂貴而能貧揆之二
公夫何愧焉眡彼顧利冒恥不爲公議之所右者其
賢不肖何如哉

河南右布政使蕭省身傳

實錄

蕭公省身江西泰和縣人永樂初科進士預修永樂
大典授刑部主事早暮勞勤而廉介自執上官材之
仁宗皇帝監國進郎中歲餘超陞河南右布政使時
河南仍歲旱蝗省身一務寬恤郡縣承風民用安之
每事存大體略小過吏民服其長者洪熙元年考最
例給誥命省身陳父年八十餘願以給父 上嘉而
從之封其父如制後有應給誥勅願先給親者皆援
省身例而得省身有雅量能容人過而不自容其
過每有小失輒赧然面赤而圖改焉人以是多之卒

河南右布政使豐庶傳

實錄

豐布政公慶景泰初以給事中諫南城及易儲事言甚剴切逮繫詔獄七年 英廟復辟陞河南左叅政論周府內官不法事 上嘉之陞右布政使廉聲大著風裁振于郡邑一日行部有一知縣簠簋不飭聞至大懼無以紓解乃以白金爲燭餽之踰數公初未之省也旣而廳子以告公佯曰試然之乎廳子曰然而不然也公又曰不然則還之耳次日從容謂知縣曰燭不然盡出之以易可然者自今無復爾矣知縣大恐輒棄印綬而去終亦不明其爲銀燭事也論

者曰此一事也而持已之廉待人之恕遠謗之智胥
得焉凡納賄於上官者上官不忍其欺也而暴揚之
衆謂其有以來之也嫌疑之際卒不免于禍若公者
非當官之師法乎

河南左布政使程公去公墓碑

程敏政

成化庚子秋予居先少保壘衣毅公之喪聞人傳河南
左布政使吾用元以七月一日終于官爲之驚怛曰
噫器宇問學行檢才識在一時負公輔之望如用元
何可多得而遽至此豈造物者之乖乎是歲冬予以
賜葬恩入謝遇其櫬邵伯河下旅次不能爲禮唁其
孤而別暨予南還則用元葬矣孤旦奉邑人前監察
御史康君永韶狀請銘其墓上之石嗚呼其尚忍銘
吾用元也哉惟程氏自東晉新安太守元譚以善政
爲民請留始家歛篁墩至梁將軍忠壯公靈洗起兵

拒侯景廟食于郡忠壯十三世生唐檢校御史中丞
灑又起兵拒黃巢凡再世有全郡之功其居祁門善
和里者祖中丞長子檢校戶部尚書仲繁用元所自
出也居休寧陪郭者祖中丞李子歙州兵馬先鋒使
南節予所自出也故予之族於用元爲近尚書十八
世孫德堅國初以行樞密院都事守景德鎮是爲用
元高祖曾祖汝楫祖景華俱不仕父顯起鄉貢進士
官至韓府左長史進階朝列大夫母齊氏封宜人用
元受經所得最深又旁通諸經史正統中長史公教
諭河間任丘而予

以尺籍隸河間襄毅公每在

來敘宗好雅愛用元以爲是必充其宗者歲丁卯
南畿鄉薦登景泰甲戌進士第觀政戶部乙亥奉命
犒師宣府總帥厚餽悉卻之都憲葉文莊公方督邊
餉與語大悅天順改元授戶部江西司主事己卯犒
陝西時尚書年恭定公待部屬嚴甚獨禮用元以績
最聞賜敕命督餉淮安一年代還上書乞歸省從之
癸未會試用薦充同考試官儀曹奉內幣踵門用元
力辭免禮部尚書姚文敏公嘆曰超出流輩遠矣朱
幾進福建司員外郎督負徵於天津諸處成化改元
晉郎中三載復以績最聞賜誥命是歲用兵遼東遣

用元給軍實師賴以濟庚寅遣視山東災上書言四
事曰存漕運以防民飢整兵備以衛民生減養馬以
安民心增接遞以紓民力事多舉行比還擢廣西右
叅政安南以地界不定數近邊用元冒險往定之乃
已理焚修墜政漸以成壬辰以齊宜人憂歸而長史
公繼卒喪葬一以禮拓先祠以謹時祀輯先德爲世
芳集以傳服闋改河南右叅政奉璽書專理國儲定
轉輸遠近適均法以便民又以其暇時葺二程夫子
闕里祠宇以風其士人戊戌晉右布政使明年晉左
布政使律已守法以倡僚屬一方晏然欲自引年章
具未上而疾作矣所部黥然聞者愕眙以爲善人之
不幸距生永樂辛丑年六十爲人恂恂謹恪口未嘗
及人之過巧佞者或竊笑之然其中涇渭極明有確
然不可易者平居恬澹寡嗜好疑若不柰繁劇而所
居官理不急不徐喜功邀譽者反出其下蓋人陰被
其惠澤甚多而世亦未盡知之爲學不事詞藻雖時
賦詩寫竹以適其適而緘其稿諱其名終不以自見
也其不自伐如此

河南右布政使沈公杰墓碑

王 鏊

沈故汴人其先以醫扈宋南渡來家蘇之長洲思陵
嘗書良惠二大字賜之故吳中稱良惠沈公元有醫
學提領諱瑛提領生彥才平江路醫學錄學錄生德
輝浙江行省醫學提舉提舉生日彰日彰生潛皇明
御醫博學工詩歷事 仁宣二廟考守以公貴封奉
直大夫歸德州知州妣楊氏封宜人公生而多病十
歲始入小學學賦詩鼓琴繪畫篆刻曾無仕進意年
二十始銳意經史學大進成化庚子遂占應天鄉試
甲辰第進士出知河南歸德州州當黃河衝隨塞隨

決公至相度源流地形高下乃於城外五里許築長堤捍水樹以榆柳又開白柳等河河水由之入淮睢民始免墊溺飢歲民流作粥以飼老弱少壯給之行糧使歸畊且給之子粒牛具戶口日增鄰封有訟久不決公立決之兩皆意滿而去部使者上其績賜之誥命入爲右軍都督府經歷出知廣東南雄府以憂不赴改授浙江衢州府衢多水田雨則溢晴則曠公大興水利濬陂池築堤堰修復魁星等閘民田得灌漑而城中無漂溢之患又倣常平倉例歲飢減價以糴收成增價以糴豐凶有賴倉無紅腐初宣聖有嫡

衢州

孔氏

襲博

孫在衢儕於齊民公始命復其家疏於朝得世襲

經博士又奏起樊尚書瑩崇飾先賢趙清獻祠爲正

知所重皆類此事聞進階中憲大夫尋擢山西左叅

政又進河南右布政使河南民曰是故歸德君耶懼

迎之未幾歸守制吳中屬逆瑾亂政坐罰米三千六

百石官有不快于公者因疏公老疾不視事公不辯

諉曰言官言是吾老矣遂卧不起居吳下十年年七

十一卒沈世以醫名吳下至公始以文學登科第致

仕方伯馭歷中外二十餘年弟燾入翰林位至春坊

諭德譙鄉貢進士吳人華之公體貌癯赴義則勇所

至興除利害汲汲若不足山西不當事河南任未久
政政不大聞其在歸德衢州興滯起廢膏枯沃瘠遺
愛寔多至今民思之亦可謂不負平生所學矣余故
表其大者表之墓上後之人尚有考也

河南左布政使劉公挺行狀

劉玉

公諱挺字咸卓姓劉氏宋汴梁人始祖諱漢臣靖康
南徙二世祖諱功甫任萬安丞遂占籍邑之橫街世
有明德高祖諱昭年曾祖諱俊英元季弟仕國朝俱
贈刑部尚書祖諱廣恒卓犖工詩翰考諱述勲累贈
武選尚書郎妣彭氏封太宜人公有異質見者拭目
成童選補邑庠弟子員爲文辭刻勵宏肆課試屢
先其列成化癸卯領江西鄉薦弘治庚戌登進士第
二甲癸丑授武選主事時大司馬鈞州馬公以嚴蒞
屬獨公筮仕深爲所器雲貴旗役冊同官欲盡革之

公稽較數日存者過半馬公喜曰活者殆萬餘人矣
武弁世廕例雖有常而滋久滋多更或緣以爲奸怙
恩附勢者又或以情尼法公持以公平蒞以精審不
以利回不以勢屈不數月銓度以清丁巳北虜有警
少司馬李公奉命閱邊庭議以公爲輔李公卒大同
公身任其事修城堡選將令出兵于私役以充行伍
竣事而歸馬公喜曰是可大任矣己未陞員外郎署
郎中事癸亥實授郎中公屢涉皆武選始終康慎譽
望隆一時僉議超拜公屬丁內艱弗果戊辰服除補
祠祭已而儀制文選有缺冢宰靈寶許公大宗伯太

原周公俱屬意許公以周公先進遜之故改公儀制
尋遷光祿少卿始公居武選多忤權貴人至是逆瑾
用事多譖之者錦衣使陽銘宿怨銜之尤深然卒不
能害而瑾反稱之己巳冬奉命勘遼陽軍屯蓋出瑾
意然竟爲同事者所芽蘖庚午春取歸會同邑蕭姓
者通番事敗瑾怒欲連坐鄉人公出補湖廣右參政
至則分守湖北勵精旬宣威惠甚著辛未擢右布政
使協心于公庶事咸理壬申轉河南左布政使值寇
擾甫息王師凱旋宴犒送迎勞費百出當事者縮手
袖間公至處之有方優裕周悉上下具宜不見聲色

衆服其才癸酉春感疾旣愈然益勤於政迨秋增劇
遂不能起公爲人精確言笑不妄而臨事詳雅接人
謙和居家敦孝友爲古章句步驟柳州有絕似者作
字類顏甚偉晚益奇易學尤精鉤深剔微卓有定見
居南雍及武選時從者甚衆一經指授輒領鄉薦登
甲科陳本初汪器之其尤顯者居官勤政崑崑自將
最爲都憲安成張公司徒安陸縣公冢宰樂平喬公
所知交游士夫稱之如出一口湖藩巡撫洎南科道
常交章薦不幸不克竟其所施命也夫生天順戊寅
卒正德癸酉春秋五十有六

河南右布政使蔡公潮行實

蔡雲程

先君諱潮字某別號霞山五世祖興二府君鄞故族
元末海上多兵患徙居臨海因家焉世以長厚稱於
鄉考貽菴府君某仕閩滄峽大使以先君貴贈徵仕
郎兵科右給事中妣杜氏贈孺人成化丁亥六月寔
生先君子京師旅舍先君自幼穎異不羣讀書過目
成誦久益不怠早失恃甫弱冠貽菴府君亦謝世孤
苦自立世充宗祊初業詩旣成更業春秋浩博精詣
於學靡所弗窺董學西蜀吳公伯通吳江趙公寬每
歲試輒優異以國士相期舉弘治辛酉鄉魁乙丑會

試魁改翰林庶吉士丁卯拜兵科給事中明年戊辰
分考禮闈所拔多名士在諫垣慷慨敢言中外想望
風采適逆瑾當事建議閱驗天下府庫虛實遣言官
中貴人雜出意在擊搏漁利海內搔動先君奉推擇
當詣閩務惜元氣存大體同事者始若落落終翕然
服從閩人莫不歸德至于今稱焉庚午轉右給事中
辛未遷湖廣按察司僉事奉璽書督學湖湘至則著
條教揭學則先行後文力振士習校閱精嚴弗爽毫
髮湖湘人士隨才造就聞風者莫不興起思慕垂四
十年于茲皆知稱曰雪反山夫子也乙亥轉貴州右叅

議貴西南荒徼蠻獠叢叢兵革相尋清平苗寇據
鑪山以叛勢搖全省先君毅然往鎮其地至則盜益
猖獗圍城數重乃殫慮經略誓死以守爲之間道轉
餉而饑卒蘇濬泉拯渴而古井出百計支持竟賴蕩
平太宰唐公龍時以御史按滇道清平日擊其事破
格論薦有曰獨當外患顛危不異於睢陽竟保孤城
功烈似過於張許人以爲允迄今諸苗帖服邊隅底
寧立生祠俎豆不忘旣而不肖往督滇學轉叅貴藩
每遇其地士民遮道問先君起居稽顙稱謝曰若翁
寔生我也自鎮遠距省城凡七程重岡複嶺崎嶇嶮

經旅行數十里無所依止乃爲之十里創亭翼然相望迨今過者莫不感頌會奉天殿災詔市木川貴間勞勤居多少司空陳公雍撫臺鄒公文盛上其事爰被內幣文綺白金之賜壬申轉福建右叅政奉璽書督儲至則躬犯炎冰徧歷諸郡運方略靖海寇嚴徵令給軍儲泉漳兵民樹大事碑通衢標表功德其在他郡相地險隘輒爲梁涂葺以亭宇大者別萬里林闢鹽田谿設北嶺飛鸞雲嶺敷化諸皆昔稱魍魎魍魎之窟一旦蒼蔚悉屏化爲康莊學士四明豐先生熙爲記其事丁亥轉河南右布政使道出建陽郡郡

故有橋名朝天跨交溪悍流適燬于火民以舟濟艱危震駭公私爲病因扳號遮留願復舊觀爲之惻然弭節數月解衣爲倡聞者爭先樂助卽日掄工備授成筭視舊倍加完美垂成而後行論者擬諸端明萬安橋云蒞汴凡注措悉務寬平幕僚有歿者貧不能歸傾月俸助之兩河四通八達之區盜賊充斥下令郡縣道周悉種植榆柳諸木縱橫各以行列不惟賊騎難於出沒且薪蒸亦資民用汴人至今賴焉未幾具疏乞休因移書一二知舊戒賫奏者必得請乃返維時撫臺潘公頃巡撫譚公續交章保留弗可得葢

自閩貴以來疏凡五上矣既歸徜徉山水陶寫吟咏
適然樂以終日性疎于殖財施人則不知倦親戚故
舊以匱乏告者靡弗賙之必不能葬者輒賻助之道
路津要故無梁者剗之圯壞者葺之其不梁者舟之
舟敝者新之其尤難爲力者如平大惡灘建邵家渡
橋移三江埠疏東泉二井除千百年害而貽之永利
殫心悉謀爲之必濟而後已他如割居址以闢通衢
脫帶金以粥道殮廣布方藥以康疾病凡可以利物
濟人者爲之略無勉強蓋自懸車以來餘二十年猶
一日也歲中每值旱澇輒率鄉耆詣神祠祈禱靡不

應驗已酉夏旱尤甚爲齋素出禱于外冒暑致疾醫
藥罔效遂考終正寢壽止八十有三是夕也烈風震
雷轟然旋繞所居屋上人咸以爲異於乎痛哉先生
孝友出於天性每惟父母不逮祿養遇忌日涕泣不
休伯氏湘涇旅葬滄峽使閩及叅藩特爲起墳置祀
田咸俾得所又襟度宏曠不立城府與人不同親疎
少長無弗通其情喜談名理間出雅謔揮麈對客疊
疊忘倦素精經術尤善啓發後先從游者多所造就
好讀書未嘗一日釋卷爲詩文肆筆而成求者靡弗
應之短章片簡率寓箴誡不爲無益語喜作大書巨

坊名扁取重遐邇乃若才裕經綸志存康濟見之施
爲者有限而蘊蓄無窮故方仕也而推賢之章交上
比歸也而起廢之薦不置卒之日聞者莫不驚悼鄉
人無老少咨嗟涕洟奔走會弔若喪所親非偶然耳
所著詩文數十卷湖湘學政一卷判義六卷編次各
言二卷對偶菁華一卷

河南左布政使楊公子器墓志

邵寶

正德癸酉冬十二月三日河南左布政使楊君以入
覲北行卒于衛輝之驛舍君諱子器字名父世爲慈
谿人唐宋來代有顯者至君高祖彥良曾祖斗瞻祖
佶皆隱以終父祿字履翁號石田以儒醫名累贈吏
部員外郎母張氏累封太宜人君舉浙省成化丙午
經魁明年丁未成進士除知崑山縣以石田憂去弘
治甲寅起復知山西之復一二年調常熟又二年考
最進階文林郎受贈封典尋召補吏部考功主事正
德丙寅轉驗封員外郎尋陞郎中又四年遷湖廣右

叅議尋轉福建按察提學副使一年轉河南右叅政
尋進右布政使是歲以湖廣榔桂功受白金文綺之
賜尋轉今官以卒歷中外若干年年五十六君生有
異質志高而銳於學初入邑庠都御史白洲李公以
按察副使提學兩浙見君諸生中曰天下士也旣而
高第主司猶以未首薦爲慊在崑山常熟延禮文儒
討論羣籍以資博洽高平則專以經義教諸生芻及
鄰邑在吏部時嘗倡爲五經會非甚病雖冗不輟披
覽同考會試以得士稱提學尤稱精鑒每談治體自
六部達諸鎮能歷道其故及當變通之宜北虜犯邊

嘗陳邊務數十事馬鈞陽劉華容二公皆重嘆許弘
治末多所建白至 孝廟山陵方起君聞有水石爲
病上疏言之至下君詔獄執不變未幾還君于職君
于謂君言于君無隱情而山陵之議大矣君旣薨石
田翁廬墓陽嘉山中至哀猶戚事張太宜人不有私
憾其忠孝大節如此君歷三年因特立政畫然歸於
禮法極力乃已毀諸淫祠而以其材充廟學公署之
用常熟稅入常後期君令先輸者無耗期日遞加旣
乃以多益寡耗足轉輸而民無敢後矣東南諸水由
常熟白塘入海工侍淳安徐公嘗合四郡疏利之會

有漲沙當海口潮汐增淤水患如故君相許浦塘便率民開之北歲衝流日深水不為患汴城苦遠汲君鑿井城中數十處皆得美泉又作屋以居織染貧匠其惠利如此君為者功郎中逆瑾勢方熾會有議薦某為某官某為某官而擬君翰林者君聞之亟為書辭於內閣事為之寢當是時辭難處辭為尤難識者以是躉君初至湖廣分守辰常道會榔桂賊起遂請改道自効冒暑提兵追平之在福建以進表至京師會轉河南時方以榔桂積勞成疾而東賊方渡河天又寒甚有勸緩行者君亟輿而往即至嵩縣居守賊

方走湖廣君曰賊逼土兵必復向汝州洛陽藩籬不可缺乃自嵩馳赴之賊至君輟食登城晝夜調手書示城中人曰不上城及上而輒下者皆斬既而有將下從賊者即斬以徇城守益堅賊遂引去其臨事應遽如此山陵之獄以救君為言者兩京科道及庶吉士進士凡若干人君性介直濟以和易與人交能以量容以情恕不能以辭色假故人於君無喜怒而有感愧性惡華侈位至方伯服食如平生時有餽遺於故舊儀而不貨吾嘗論君學政兼資惟古之師氣以節志久而益篤使遂大用當有以副人望者惜

也階也及而命溫之然其所建立亦足暴於天下矣

河南左布政使孫公存行狀

胡松

孫氏之先於元爲萬戶七世祖有諱仁者歲甲午自濠梁從高皇帝下滁卽郡北孤山之麓家焉以農爲業仁生子慶慶生子二曰聚曰會聚代仁卽戎累戰功授永平衛百戶靖難兵起隨文皇帝渡江陞營州前衛正千戶會力田讀書好禮鄉人稱善人云是爲公高祖生子和爲公會大父和生允恭正統丁卯應天中式戊辰中乙榜銓試嘉魚縣學教諭遷顛州府學教授父諱序中應天成化癸卯式累上春官不第除福建建寧府推官性峭直不徇理積訟有聲

於閩生子七人公其中子也諱存字性甫生而慧穎
力學強記甫冠督學黃侍御如金試其文最極加稱
賞正德癸酉年二十有三領鄉薦甲戌賜進士出身
授禮部祠祭司主事已而改儀制司三年考績 武
皇帝勅封建寧公如其官贈先嫡母李繼封嗣嫡黎
爲孺人未幾陞本司署員外郎奉命冊封趙王妃惟
謹贐餽一無所受已而丁生母李憂哀毀甚服除仍
舊官辛巳進主客司署郎中會今 上入繼大統大
婚有日公上疏略曰夫冠者禮之大也是故古者聖
王重焉肆我 太祖高皇帝稽古定制詳載大明集

禮 陛下龍飛潛邸萬國式瞻今當嘉禮納后之月
宜詔禮官會翰林院詳議舉行天下幸甚 上嘉納
之於是聲名聞廷中高麗琉球諸國數貢無度公謂
非體以白太宗伯議請仍舊俾有常絕其私覲客部
例於四方諸邊徵集諳曉夷語與夷字人試其可發
鴻臚寺若四夷館廩餼而敘遷之以待四夷朝貢人
文之至名通事與譯字生然隨地廣狹因貢疎密人
有定額不多置歲久弊滋諸率夤緣爲利額外冒進
甚乃甫通籍而棄其本業希捷徑得直內閣或典郡
縣者濫甚公議請以詔令行之黜革數十人已奉改

元詔大賚文武吏士悉允覈光祿寺歲受六安芽茶
供上用柄事者額外恣取民不堪命廬州府知府
龍誥奏言之事下禮部公爲裁議爲中制并請損及
內閣供數得旨報可壬午冬遷知江西贛州府府治
巖險多盜賊且健訟提督都御史兵備副使皆治其
地事繁劇公明於聽斷而廣設方略獄訟與盜咸爲
衰戢頓于法食廣鹽鄰郡袁吉臨江三府則淮也然
淮鹽貴泝而難廣則賤沿而易故三府希不坐犯私
交稱便利焉任未暮癸未冬丁建寧公憂還籍丁亥
起復補知湖廣長沙府治先教化而抑強橫郡側湘
江西岼嶽麓書院舊矣山川蟠麓爲宋儒朱張兩先
生講學所由宋逮今興替率以其人公嗣加修葺刻
今皇帝御製敬一箴其中增置祠田選諸生秀異
者俾顓講習暇日親臨督課彬彬焉多所造就爲時
聞人者甚衆郡有吉藩先是王奏乞田千二百餘頃
名雞鶩食分坐長沙等八縣弘治已前畝征銀四分
二釐蓋定制繇正德來府中輒遣官校戶斂之官校
又緣爲私利計畝之徵蓋率兩倍其初民大不堪公
請仍舊貫但令縣徵送府府送長史司使類封以進
官校不得肆民大悅是時戶部得請命天下有司積

穀而以其所隸里數爲之率歲滿戶部奏旌其最公積穀至中餘萬秋夏稅糧起存百凡餘萬萬吉府長史司濫受詞牒捕得人輒拘繫號門監甚者罰楮穀金錢勢張甚戊子冬會入覲有詔求言公列事二十有七上之部院多所採聽其禁受詞以專輔導一事則專譏切吉傳吏部以爲深切時弊請通行禁革巡撫都御史潘公亟薦其治行請大用然緣上事遂爲吉潘所構於是撫察思所以全之合奏調公荊州府報可適辰州保靖宣慰司彭九霄四川酉陽宣慰司冉儀爭地界各具奏詔行兩省撫按官劾兩省撫按又畀其屬蜀得僉事劉公楚得公兩賢素相知矢惟一心悉索乃情使輸平且勒石爲界還報稱允始公之勿從建寧公學於閩見建寧公與老吏論難律意率至夜分知讀律之難及仕又承其祥刑守官之教旣知諸大郡歷年久見世所刊律解附例多舛且新故弗別解亦繁蕪于是更取律之全文大書於前凡御製諸書若大明令大誥三編及會典於律有互相發者特書次之欽准條例分類附書又次之諸家註解節取其要與正德新例法司見行諸比可備參考者皆細書分註爲三十卷題曰大明律讀法以上自

大明律讀法

狀後錄

卷之九十二

三

爲序其略云大明律讀法者讀大明律法也律與經配讀經者必窮之六經以通其理必考之傳註以疏其義必驗之諸史以論其世讀律於御製諸書猶六經也解疏諸家猶傳也諸條例猶史也庸可以不知乎其書雖未公行至今司刑者竊以爲便荊州諸衛屯田子粒法當上之郡庾俟轉給迺諸豪滑往往詣屯輒收其直陰賄吏而以已或他人俸錢潛抵數徒虛造關領公悉釐正寘法理在刑二年積有贖金罪穀凡數萬最于楚省都御史凌公援例奏請獎勞之會有緣法過甚致被口語者戶部休而寢然公之才

名已赫然在當世矣於是吉藩諸陪臣忌公將大用不利已又撫長沙往事數挑王奏公置對當事者往往避忌莫爲明積數年而後解吏部以其久次也不埃赴部補公處州府處在萬山中而當甌閩孔道他守或飾廚傳以稱過客公嫉其然甫視事卽爲奏言其疾苦如均賦役當照里數與蠲貸逋負料價免派新造戰船材直及精選甲科以知縣事併疲里以省實害申明優免則例以釐積弊事多所施行枯故勤於稽事然苦乏水旱卽赤地公爲鑿洋彭峽修治好溪偃月二堰約可灌田千餘頃民惠厥德十縣歲解

錢糧至府故有加增名水脚銀積之可千餘金公悉還之靡所利巡按周御史首加論薦丙申冬公念生母久未得贈上疏闕下曰臣前禮部猥蒙聖恩臣父若母並得封若贈惟臣生母以嫡在停格緣國典章不敢輒有塵瀆其後正德十有三年七月臣生母故距今十有九年墓木拱矣臣竊詳法意嫡母在則停生母之封者以二母俱存嫌於耦嫡故停之以嚴嫡庶之分也若生母歿而嫡母存則封其嫡與贈其所生要似無嫌而可以伸人子風木之恨臣愚昧歿不勝拳拳下其奏史部吏部議是請贈其母李爲恭人名已赫然在當世矣於是吉藩諸陪臣忌公將大用不利已又撫長沙往事數挑王奏公置對當事者往往避忌莫爲明積數年而後解吏部以其久次也不埃赴部補公處州府處在萬山中而當甌閩孔道他守或飾厨傳以稱過客公嫉其然甫視事卽爲奏言其疾苦如均賦役當照里數與蠲貸逋負料價免派新造戰船材直及精選甲科以知縣事併疲里以省實害申明優免則例以釐積弊事多所施行括故勤於稽事然苦乏水旱卽赤地公爲鑿洋彭峽修治好溪偃月二堰約可灌田千餘頃民惠厥德十縣歲解

錢糧至府故有加增名水脚銀積之可千餘金公悉還之靡所利巡按周御史首加論薦丙申冬公念生母久未得贈上疏闕下曰臣前禮部狼蒙聖恩臣父若母並得封若贈惟臣生母以嫡在停格緣國典章不敢輒有塵瀆其後正德十有三年七月臣生母故距今十有九年墓木拱矣臣竊詳法意嫡母在則停生母之封者以二母俱存嫌於耦嫡故停之以嚴嫡庶之分也若生母歿而嫡母存則封其嫡與贈其所生要似無嫌而可以伸人子風木之恨臣愚昧死不勝拳拳下其奏吏部吏部議是請贈其母李爲恭人

焚黃墓所尋陞陝西按察司副使奉勅整飭臨晉

涼等處兵備甫之任道得除書遷江西布政使司右

叅政分守南昌道以明堂大饗禮成贈教授公建寧

公俱大中大夫江西右叅政祖妣鄧氏嫡妣李洎生

母李俱淑人封嫡母黎太淑人已而奉表入賀萬壽

聖節還任遷河南按察使得報慨然有策勳樹功之

志時汴省一二巨室橫于鄉至或殺人前此蓋數被

奏訐然莫有能寘理者公憤而竟其獄皆當以大辟

以是謗書四塞賴當路知而保持之尋轉本省右布

政使未幾轉左汴人之困公悉知也於是悉意經畫

議省比歲藩祿誤增之數而補其止缺擬裁諸府冗
役民校而禁其濫保關寺以無益俸薪臺隸之給僉
議以爲是壬寅秋山西被虜創甚遊騎至澤潞聲振
衛懷朝議增重總督宣大偏保制府事權河南山東
兩省聽節制公乃列上禦虜方略於督府其略曰愛
養民力以破虜計收用不逞以散虜與出搗巢穴以
速虜歸設伏出奇以挫虜鋒重懸賞格以購虜首許
貢給賞以薄虜毒耀兵防秋以奪虜氣神道設教以
惑虜見先聲虛喝以搖虜心總督奉翟公大稱善
癸卯秋鄉試公先事提調因一 恭氏卒於任

護喪南歸以附於建寧公墓甲辰春被考得調時
宅憂乙巳冬服除例當如部公嘆曰以吾之衰遲尚
可奔走數千里覓官耶丙午春上疏力陳衰病願乞
首丘不報然自是亦無意于形勢之途矣丁未春再
考被免公方爲山鑿沼築臺構亭樹藝花卉竹木爲
於菟計乃是歲秋七月疾作竟不起距生弘治辛亥
年五十有七公天性英敏美姿容多才藝爽朗跌宕
善戲謔與之杯勺燕會時令人解頤尤善理財聽訟
雖積年逋負能使無遁十餘歲滯訟一覽而決駁歷
中外逾三十年承部院大臣方公獻夫等剡薦無慮

十餘疏博學泛覽不名一家爲文藻瞻流麗書法清
媚公弟環山司徒從其所得文集若干卷詩若干卷
奏稿若干卷居平不喜佚游靡費雖隆冬盛暑筆札
書牘未嘗離手不則課奴僕樹桑飼蠶力可耐水分
茅灌蔬雖墮核隕籜寸絲片楮必自綜理又得綱紀
僕數人佐之故羨於貲公歸得藉與賓友相娛樂以
此

參政

河南布政使司參政鄭居貞傳 忠節錄

鄭居貞徽州人豐頰美髯從父潛官閩中師貢師泰
洪武中舉明經授鞏昌通判陞禮部郎中文行爲時
所重二十三年進河南參政永樂初坐方賞論歲初
孝孺之教授漢中也居貞以詩送之曰翩翩紫鳳雛
羽翮備五采徘徊千仞翔餘音散江海於馬覽德輝
濟濟鏘環珮天門何嵯峨羣仙久相待晨沐晞朝陽
夜息飲沆瀣如何復西飛去去秦關外岐山諒匪遙
啄食良自愛終當巢阿閣庶以鳴昭代孝孺亦贈之

文謂其叅政河南三年而去吏民以不能留爲憾云

河南左叅政李公崙傳

何景明

李崙字世瞻臨潼人幼篤實莊重雖祁寒盛暑手不釋卷成化己丑進士爲廬州府知府清慎自持不然官燭鋤強禁暴興學築堤百廢俱興歲飢公徧歷所屬加意安集出庫藏銀帛令自易食春初價貴始發倉廩賑濟全活者甚衆所屬起解馬匹令輪流解馬七戶資之民困始蘇戶口鹽鈔存留令原解價以三之二給官軍一充府庫君民兩便巢縣大河水急人每溺歿創立浮橋以便往來自用淡薄一案衣至八年方易陞河南左叅政去日遮道挽留者以萬計立

碑頌之居家有都御史與同年者遺之木使屋焉不受比卒貧不克葬其後夫人郝氏不能遣日守臣奏
命有司月給米養終其身

河南右參政閻公仲實墓志

楊一清

予與隴州光甫閻公友三十年知其行甚悉其尤度
越人人者考功典天下諸司官吏殿最黜陟公歷主
事員外郎郎中門庭如水年格浸深且大拜累疏乞
歸田太宰濟南尹公雅知其賢固留之成化甲辰出
為河南布政司右參政明年乙巳遂懇乞致仕以去
年纔五十三有錢若水之風焉歸乃築室岍山足跡
不至城府部使者就見則見之不往見人因舊業增
置水田數十畝課僮奴耘耔灌溉歲收所獲以自給
不別治生嗚呼世之人顛毛種種垂死不能忘情于

富貴不得已而去又恒藉官府聲勢以爲重以奔走其鄉之人波流風靡中如公高蹈者幾人哉予提學陝西歲按隴州必造公最後相見爲弘治丁巳公送予岍山之麓立談久之將別屬予曰君自愛恐不復相見矣予愕然徐應之曰明歲當復來公曰諾竟以事左負初約今年春予入京師纔數月而公訃音至矣前日之言遽成永訣嗚呼傷哉公之子价侃皆予門人哭詣予請爲墓志銘廼按工部右侍郎史公所述事狀而敘之曰公生六七歲讀書日數千言過目輒成誦十五善屬文隨父靜樂君任岳陽屬邊報方

殷所司承部檄選官民子弟習兵法武藝以備非常公與焉未幾盡通諸兵法尤善騎射靜樂君曰是非所以教吾子也止之令專力於學比遊京師訪明儒學益進補郡庠生景泰丙子舉陝西鄉試第一年纔二十四成化己丑第進士旣仕有官守循不廢學者而家居益大肆力於經籍汎觀約會充然有得發爲詩文質而不俚根極理致有葵菴集藏於家所儲書至萬餘卷爲書院建崇經閣貯之增建堂齋延師擇徒慨然以作人善俗爲己任爲考功隨人才器鑒別精當公論倚以爲重尤嚴馭下吏莫敢爲奸特宰好

任耳目廉視幽隱時摘發之以爲明羣情懍懍公嘗與僚友議及曰爲宰相當如泰山喬嶽察察非大體廉者以告一日謂公曰外人議我察察有諸曰有之得之何人曰公爲大臣第視其言當否以自修飭不爲無補不必求其人時宰素重公終以是忤未幾有河南之遷值歲凶人相食遍歷所部存省賑貸暑雨祁寒未嘗告勞賴以全活者甚衆奔母氏喪扶櫬徒跣三千餘里居靜樂君喪哭過毀悉屏世俗浮屠陰陽家之說治葬與祭一遵晦菴家禮自是縉紳家稍稍化之與人交敬雖久不衰遇貧與喪者樂爲賻助

未第時道出某邑友人爲邑令訪之有驕色急辭去後邑令以考績至謁公考功愧悔謝罪公曰故人也待之如初國子生華陰周某卒於京爲置棺歛歸其喪驛丞李廣客歿子流落京師貧無以謀食鬻其孫公聞爲贖還之給道里費以歸公之爲德於鄉者類如此初公旣謝事每謂人曰吾事畢矣歲月將不我延生寄也歿歸也後事宜預圖遂召匠採木爲棺槨以俟未屬續之前忽謂諸子曰吾某日將往先塋是日果卒亦異已仲實公名光甫字也葵菴別號也大中大夫其進階也有名秀者隱居隴州之魚龍川以

唐後金 卷之九十二
孫仲宇貴贈都察院右副都御史公祖父也名璿嘗
作靜樂堂訓子弟鄉人因稱靜樂先生舉宣德乙卯
鄉薦歷南充岳陽昌邑廣昌濟源諸縣教諭以公貴
贈吏部員外郎又以季子仲宇貴贈都察院右副都
御史公父也贈淑人劉氏其祖母王氏其母也初封
宜人後以子价貴從夫階進封淑人王氏其配也仲
寬兄也仲宇乙未進士累官都察院右副都御史今
巡撫湖廣仲容國子生仲寅仲賓仲宏仲寧皆弟也
子五人長价次侃次倣爲醫學典科皆王淑人出次
洗次偉側室李出也曰鈍曰欽戊午舉人曰鏐
曰銓曰鈞曰劄其孫也六十有七其壽也

河南右參政顧君福墓表

李東陽

吾友雲厓顧君居母喪時廬於姑蘇周山之墓予歸
自湖南夜抵廬下呼而起因歎世所旌廬墓事多文
而寡實雲厓旣不自衒當時有司亦無能旌之者後
三十餘年知府林世遠始旌於朝未及報而雲厓卒
矣予故表于其墓特舉其大者先焉雲厓姓顧氏諱
福字天錫雲厓其所自號也爲江東著姓考諱賢以
工籍隸順天之大興後贈儒林郎光祿寺丞雲厓以
成化乙酉舉鄉貢丙戌登進士第歷刑部主事員外
郎郎中調永州府同知遷知吉安府擢河南布政司

右參政分司南陽致仕卒初在刑部聲甚著錄囚山西多至七千餘衆平反者六十餘人前後四十餘疏多見采納每攝他司事事皆立辦勘獄浙江發巨贓七千餘兩時錦衣千戶吳綬勢甚熏灼勘獄者皆往受成議雲厓獨不往會下詔獄遂摘其疵誤出永州受檄決獄至兼劾郡有部檄徵芽茶香草雲厓計合藩所徵全數上疏請停之至吉安承大猛後稍濟以寬剝理繁錯不動聲氣而條緒具舉張都憲公實用都憲時可劉侍講景元皆慎許可特稱顧君獨不善事上官或以簿書相窘然卽所治校之諸郡不帝兼

之矣陳時政六事時議躱之參政報至民兵數千人遮道泣送府及千戶各所留一靴以表去思南陽宗藩軍校多不戢每用理斷亦無怨辭撫徠流徒復業者四千餘戶修諸葛武侯廟及閱武塲開拓有加其去也以老疾名蓋郡人在言路者以私請弗獲故陰爲媒藥而其藩人猶惋惜不少置雲厓乃自嘆曰藩不負吾而郡負吾賴幸有二三知己者尚存何言哉知己張劉周也雲厓旣歸日與鄉大夫士觴咏爲樂足不至公府手不操書札惟歲時以詩寄予未病前一月猶然嗚呼詎意其遽至此耶雲厓尚意氣故人

潘郎中琚客歿殮葬之其子鼎方十歲携以自隨比
長以女贅之又置田廬於蘇居其寡孤後鼎舉鄉貢
卒於京又遣人葬之趙知府禎沒又以次女妻其子
鎬尤篤倫誼弟祿早世葬北上者二十年亦歸耐于
祖墓卹其娶俾不貳志今旌爲節婦事其兄光祿丞
禎甚謹嫂欲析居卽俯遜於外泣告於兄乃得歸然
引咎自責未嘗一以語人蓋難之而廬墓事尤大且
著云

河南右參政吳公愈墓志

文徵明

公姓吳氏諱愈字惟謙晚號遜翁世家蘇之崑山曾
大父子才大父公式贈承德郎刑部主事父凱字相
虞仕終禮部主客司主事脩正強執事母篤孝年四
十棄官歸養鄉人私謚貞孝先生母安人陳氏公生
正統癸亥八月一日成化戊子以縣學生舉應天鄉
試乙未舉禮部會試廷試賜進士出身戊戌授南京
刑部廣東司主事己亥丁母憂甲辰復除本司主事
歷員外郎郎中弘治庚戌陞四川敘州府知府癸亥
進河南右參政明年甲子致仕嘉靖元年壬午以登

極恩進階嘉議大夫五年丙戌五月終於家年八十
有四公自少開朗書過目不忘嘗詣外舅夏公仲昭
閱壁間文累數百言閱已取筆書之不遺一字資既
穎異又敏學強解不遺餘力既連舉得雋益精進不
懈初官比部卽思明法以達于政每退自公輒取獄
詞翻閱凡事始章程傳爰論報悉究而通之事至迎
解不煩檢會所部兼理畿輔事尤苛劇公省決敏利
庭無留獄析律詳明所當必允苟得其情雖貴勢不
避特留守中官驕不奉法會有事當按公持之急中
官使人宣言款公且懼以禍公酬對間整語直而遜

卒竟其獄不少骫骳然不爲深文內庫遺火事連中
司坐死者數人公具獄以比請尚書言情罪旣得奚
以比爲公曰法如是不可踰也尚書執不從獄上何
文肅公當讞閱其牘稱善曰此吳郎中筆也但所坐
非正律宜以比言卒改用比律奏之尚書乃悔不用
公言由是益任公每公當遷輒奏留之凡一進官皆
不離故署會詔大臣舉屬吏尚書鄭時侍郎徐懷聯
章薦公堪長藩臬奏上而敘州之命已下敘去京師
萬里俗獷喜訐吏多並緣爲姦公始至判牘日以百
數吏故驕列數事嘗之公且判且閱隨摘所矯數事

訊吏吏叩頭伏公既精敏善發摘而濟以嚴重有犯
卽繩以法吏畏民懷訟用衰鮮尤慎刑獄每行縣錄
囚必有平反慶符盜正晝劫縣誣執二十七人皆抵
死公審鞠左驗惟二人真盜乃悉縱遣二十五人其
後果獲餘盜貴州都勻用兵敘當轉餉而道路險遠
公調遣節適民不勞而事集出諸郡上有詔錫楮鏹
文幣旌之所屬長寧筠珙夷獠雜居剽悍易動公撫
以恩信示之禮法久皆懷附然無故不輕調集會撫
臣移文發其渠率至省閱習公執不遣曰犬羊之性
未易擾伏萬一奔迸不可安輯撫臣不以爲然欲致

之已而椎剽鹵掠旋不可制公手書之楮諭之卽復
弭帖蓋公推誠待物素爲夷獠信向如此上官安
以馬湖叛有詔掩捕而敘實比壤藩臬重臣咸會于
敘公言鼇輕剽無遠謀然器甲精利兵亦矯健未易
攻取不若重圍困之彼中無水不一月可坐而降也
議未決而鼇棄城走將糾諸夷爲亂衆相顧不知所
爲公徐曰鼇在吾殼中矣問故曰彼以郡守將兵接
戰勝負未可知旣離巢穴一窮虜耳所轄諸酋長皆
其深讐彼且無以自容又何能爲因遣人襲而執之
曾不血刃而元凶授首及改設流官其醜類不服復

嘯境上劫郡印爲亂衆益恇擾公親叩其壘好言俞之曰若等情有欲言言諸朝當有處分何以印爲之出朝廷失一印復制一印於我何損若持去特一敗銅耳吾憐若以無用之物自陷罪辟故爲若言若無以印爲也衆卽委印解散自首事至救寧公皆在行間謀畫多自公出比奏報而賞不及公衆爲不平公曰敘與虜接師或不競敘寔先禍此守臣責也今得無恙幸矣在郡九年勸農振業興學教民民靖化洽歲亦比登乃平繇更賦勾考邊儲之侵於民者得四十餘萬輸將轉調亦數十萬糜不此充以時賑發流

庸來歸戶口增羨郡以大治在河南兼理屯田時田多爲藩府乾沒及勢家漁取或假中官芘覆厭抑詆調莫能致詰公訾省鉤校多所緒正在省一年展采錯事方將有爲而臺評出矣會蜀士有不悅公者復從中醞釀之而公亦已倦遊遂致仕去公識慮精審舉動詳緩每計事必要其終斟度分劑不少滲漏一時雖若迂遠而積久考成往往有餘沿牒往來非公事不輒乘官舫雖遠不給過所官中餽遺一不受亦不以官物遺人嘗自言在官經費一錢以上皆注籍令皆可覆其可爲必視法所在故歷官中外未嘗一

掛吏議其待屬吏特嚴雖少喜不假于色詞所不喜者亦不輒肆詆挫不立科條不收聲譽而質行履方往往出銜名者上故所在政事卓卓尤不欲有所附離初登第觀政兵部部僚有與當路比者雅喜公故爲引重欲援致要地公謝曰某忝列進士入官自有本末因緣進取非所志也其人愧謝後當路敗所引咸坐廢而公無與時已躋公卓識其後益勵不變浮沈常調者垂三十年晚始邂逅一奮而竟以讒罷嗚呼此足以占公之所立矣家居出入起居咸有常度接人和而有辨故雖燕笑融洽而人莫敢慢人有過不面加誚讓惟對之不言而已其待子弟亦然然人每以是候公顏色所加甚於質責也故諸子若孫咸孳孳自將無少縱弛閨庭雍睦訾毀不聞邑中稱詩禮家必首及之雅喜賓客讌設精鑿禮文祥雅周旋樽俎間終日忘倦晚歲聰明不衰音吐洪暢理言遺事歷歷記憶每對客舉似不必深竟顛末風流雅尚奕奕照人蓋以高年令德爲鄉邑之望者二十餘年嗚呼今則已矣有如公者可復得邪

河南左參政秦先生文墓志

鄭度

先生諱文字從簡號蘭軒後號雪峰其先閩人也自
閩徙台之黃巖再徙臨海遂爲臨海人曾大父諱世
珙大父諱宗傳父諱盛字彥彬號復齋以先生貴累
贈刑部郎中初宗傳無子有青鳥集庭下遺二卵而
去已而生二子次卽復齋娶董氏生先生先生九齡
而董宜人卒哀慕不能已稍長輒知事復齋公復齋
公性嚴毅務得其歡乃已弱冠以舉業聞堂堂然出
人士先矣猶與靜學戴先生輩爲道義交益務進修
不怠弘治壬子以毛詩中浙江鄉試第一士論服之

明年癸丑登進士第觀政二年授南京行人司行人
三年轉司副四方從游之士戶外屢恒滿既滿考得
歸省矣未至而復齋公卒哀毀幾無以爲生正德中
服闋始遷刑部廣西司郎中時逆瑾之亂羅織京朝
官刑曹易染尤甚先生以身殉法不少貸讞獄精明
老吏皆自以爲不及瑾竟不能害未幾遷貴州提學
副使貴州學政頗簡類兼清戎糧餉等務先生於養
士外又有區處方略軍民便之踰年以吳太宜人憂
歸服闋仍改陝西先生之兩以憂歸也借宅以居蕭
然無長物終喪三年守禮勿越至遇國哀必朝夕臨

如制而止其兩爲提學也以身爲教親爲講解
大以抑奔競黜浮薄爲先兩地士習爲之不變初
先生之未拜貴州也楊冢宰又欲以江西啗之要之
來見竟不從自陝入覲也嬖倖錢寧孫安廖鵬各以
其故來視輒謝不見後亦不能害之在陝二年遷河
南布政使司左叅政陝人咸以先生海內鉅儒置非
所宜處頗有遺論焉抵任覩河洛居民蕭條甚而
武宗巡游調度日急慨然告病以歸撫按知不能奪
以聞于朝有詔嘉其恬退許之於是先生年五十有
六矣餞送者一如在陝時一無所受後先歷官三十

年而一介不苟時之益嚴蓋其天性云先生之歸也
杜門謝客足跡不及公府日惟教養子弟波及鄉之
後進焉自家食以至行人時五經之士各爲指授矢
口成章士爭錄之先生體貌顯重詞氣和平不問而
知其爲成德君子其學術甚正而仙釋之說一不入
於心復不爲近世門戶同異之習而士益就之自其
出以及歸老上章薦之者比肩而其志獨不奪其所
得者終不與易矣嘉靖己丑卒年六十有七

河南左叅政潘公鎰墓志

潘潢

公諱鎰字希平少穎敏劬書總角臺試論孔門諸子
之學甚具御史異之釋褐除南京戶部主事差監浙
江北新關至輒搜七稅司若省州老猾數十置諸理
而罷鎮守無名之需歲二千金稅入出必先有司部
舉凡嚴鉤稅而已關長日不閉縱民往來無所問才
半月鈔額告溢則盡蠲小稅稅自某等以上亦各損
舊則十二是歲薄征而鈔倍上下同聲賢之公愀然
曰非吾意也歲入贏縮視客艘多寡比者北方道梗
浙商偶輻輳焉苟以是爲率民弗堪矣乃疏其故而

可爲
權關
昔法

歸其羨於大農以佐賑聞者知公識高而慮遠愈賢
之於是巡按御史歐君珠陳君德鳴韓君奕連疏乞
久任公待以不次而公及瓜趣代益急上乃擢公
署員外郎郎中公革部中白直三百人宿蠹一清尋
知荊州改長沙丁外艱補兗州所至戢盜賊平賦役
興學校清獄市卓然良二千石陞山東按察司副使
整飭霸州等處兵備扈駕稱旨擢河南布政司左
叅政坐先奉詔治前驅廷謝後期爲御史胡守中所
誣執罷歸縉紳惜之公性孝友始第時中憲春秋漸
高公憂形于色往往終夜不能寐痛母若兄早世間

語及雖垂白猶泣下不自勝授二弟易皆早知名仲
氏舉明經自高安令拜地官郎公猶諄諄戒勉補助
其不及甚力與人交不立畦町而胸中涇渭不啻較
然在南都時涇野呂先生重其爲人作荆人父母篇
爲別而大司徒梁公亟稱公廉翁諸郎吏右都御史
懷慶何公題石尤詳旣免官兀坐草閣發憤經子有
得間書以見志於時族子有私歸女弟惡少年者公
正之不得但書其冊曰吾視春秋狄奪衛女衛告魯
曹狄屈而歸衛女衛受賂復女于狄且曰不可者魯
曹也狄怨魯曹古今人豈不同邪聞者凜然狄衛魯

曹皆同姓其不惡而嚴類如此使得意大行豈可量哉居二年遭繼母喪哀毀遺疾以卒年五十有三

河南布政司右叅政丁公致祥墓志

公丁氏諱致祥字原德別號近齋世家常州武進居馬跡山雁門里曾大父以仁大父景和父潔以公貴贈戶部郎中母宋氏贈宜人公生而凝重寡言笑比長通經以古文辭名於鄉鄉之巨族爭延致以師子弟嚴飭規範多所成立以儒士累試南畿始舉弘治甲子鄉貢登正德戊辰進士第授戶部主事監居庸德平軍儲出納有方暇與州學諸生講究經義諸生憬然改聽當正德時天下多事國用匱乏部使四出公往閩廣清鹽權之匿於奸者數十萬及疏利弊五

事於朝多見采納大司徒屬十有三分理邦計而陝西署主百官俸給錙銖易生訾謗公爲郎持衡若一人稱平焉歲漕自江達淮至京多滯部推公督之公先興復儀真舊閘專堰利者以浮議沮公公不顧仍集諸名人碑文附以已見爲錄刻之圖永歲可省費萬計而運遂通擢湖廣布政司參議分守上下湖廣荆南道有武弁某犯罪希關節以免公竟置之法江右有客于楚者保長與仇誣以盜獄成公廉其情白之湖南歲侵躬自巡省多方賑貸所全活者甚衆武岡州民業見侵沒於藩府官校歲久莫能決公從容

誠士以利害卽斥令割還之民凡五年詢民瘼爬搔釐革若切於身必去之而後已擢陝西按察司副使撫民漢中屬界川陝之交流民遭聚易亂公平易率物釋繫囚按賊吏威懷並行部以無事夏秋淫雨災甚民居蕩析公檄郡縣盡括帑藏諸羨餘賑之焦勞蒿狀民得以蘇於是撫按臺交薦之猶在楚也遷河南右叅政己酉入覲事竣以引年致仕家居適志山水游心六籍自娛歷官三十餘年囊無長物惟題咏篇什甚富若恭華武夷黃鶴諸勝各有紀述而風俗民情因以槩見諸集中可考也平生不爲矯狷崖岬

以來自異所與無大小悉任誠推分無失色失口於
人又不以宦勢凌諸鄉曲至於談說理道世故人情
若洞燭其然無毫髮之爽故皆竦聽樂與公游久而
不敢慢易有古鄉先生之風焉卒之日年七十有九

河南左參政劉公友仁墓表

王慎中

嗚呼予何忍表劉涵江公墓哉辛丑歲予與公同罷
河南叅政予方倨侮自恣馳書于公約遊淇水三屋
太少二室武當山相携而歸公艷然徑歸且報書曰
君報罷猶出內批孰不知為權重人所為如吾誰當
為明者吾歸矣不能從君游且宦其土方見罷而又
往遊焉得毋太作意乎予時已至淇上彷彿百泉蘇
門之間愧公之言徑趨安陽訪故學士崔後渠先生
談數日亦遂歸不復至孟門洛陽矣嗟乎公達人也
既已罷矣何必使人知其為誰所為者而公報予書

其言如彼公平生約已守官儉薄踏苦獨蹈人所難
要欲以見于世而今猥與不肖同罷宜其不能忘也
嗚呼悲夫予何忍表公墓哉然公已沒世予卒以悲
故不爲文誰當明公者予又何得不表公墓也劉氏
故莆之涵頭人祖均長仕元爲漳浦縣尉因以家焉
當 文廟時有仕爲宿州知州名觀者有能吏名實
公高祖再傳爲封南京禮部郎中公淵公之父也郎
中公娶封宜人周氏公名友仁字是成原所由徙故
號涵江以示不忘其始以正德甲戌進士始授南京
戶部主事轉禮部上客司郎中遷知黃州府以母喪

去職起復爲衡州以才調廣州遷湖廣布政司左丞
政遭郎中公憂起復爲浙江右叅政調河南左叅政
撫民南陽其爲戶部嘗監淮安榷稅及持節往使湖
廣理賦督發其滯逋以填京庾榷稅故毛細易汙爲
之者往往矯厲苛核皦其迹以冀自免督賦所臨遇
皆藩郡大吏至者輒弛懈不欲急懼見爲觸公在淮
安尤簡易與商爲便督賦故嚴密鉤剔滲匿不以藩
郡尊鉅爲忌二事以集竟免汙跡亦卒未嘗有所觸
黃州江漢經流之衝民蹙政煩前守日夜治文書不
賓客寢食不得休衡州在山谷深奧處田野饒足郡

中嘗暇因習爲偷公兩易其俗爲張置爲黃州政每
閒尋周瑜破曹孟德故處酌酒弔之與客汎舟婆娑
甚適日與諸生考論術業第其得失獎飭之文用大
振比公去而以文奮爲時名流者項背相踵皆公所
教士也衡州置郡南岳之下顧未嘗一游而設約束
布條教起民之窳雖在郡日少恩施未洽而精采有
加焉湖廣浙江叅政主督版冊財計宜爲米鹽公獨
疎目關節顧絕無漏失撫流逋多以寬捨致安樂一
稽察誅賞公用之不少貸唐鄧之間益用和懷其所
治各有以自得如此而其尤難在廣州嶺南土廣民

衆莫如廣州且據會省部使者藩臬監司所治人性
各殊難於齊調郡於其時賢貴人在朝最有權望鄉
里多附麗之者強則折而弱則靡公持其閒而免焉
蓋其尤難也公平生廉謹自好居官所至不以細如
毫毛或苟而有取其于人不爲苟予性尤闊直朴率
無機數曲節旣無以買名譽寄援汲而居官輒得賢
聲官輒起由其廉謹不取雖有憎怒者不能加點而
然也然在浙江爲言者所論在河南未幾卒以罷歸
則以寡聘遺簡迎將雖其廉謹而終不足以勝憎怒
者之勢也嗚呼其可歎也夫公歿二年旣葬其子祥

鶴持其族昆約齋中丞公之狀與林二山中丞公之
銘謁予曰願有以明先君者予主廣東辛卯試事公
屬在廣州共事院中留都主客爲郎覽壁中陷記摩
娑題名得講其風美最後同爲河南參政又同罷也
其言宜可信於是爲表於其墓曰有以自待者必不
託于人于人無所託則其享于世者亦不能遂彼所
謂自待者皆矯強鷲卓恃已而卑物奇跡以驚衆其
不能遂意於世固其自待者所自召與公誠無所託
於人而任質徑情貌恂而詞幅非期與人爲異有所
戰薄於才鷲聲角之場者所遇竟若此何也豈材與
不材之間固其所難處耶然公終始所尚無少異而
始見爲賢終以得罷予又以感夫世尚之變蓋三十
餘年之間而仕者見容之難易其可觀矣



中興御金

卷之六十一

四十一

